

Guangjsih Minzcuz Bau

ganhhau: CN45-0036 B.2019 Nd.6 Ng.12 liggaeuq geijhah nienz ndwenngux cocib

广西民族报

(壮文版)

主办:广西区民语委

出版:广西民族报社

出版周期:逢星期三出版

出版期数:总第3378期

Guengjsae Bineix Yaek Ciusou 145 Boux Siujyoz Cuengh Gun Song Vah Saw Dinghyiengq Son' gyauq Lauxsae

Mboengqneix, gicej daj Swcigih Gyauyuzdingh roxyiuj, Guengjsae bineix yaek ciusou 145 boux siujyoz Cuengh Gun song vah saw lauxsae dinghyiengq son' gyauq swfhanswngh, doengh gij hagseng neix dinghyiengq youq Namzningz Si Vujmingz Gih daengj 21 aen yienh(si, gih) ciusou.

Ciuq cam rox, baez neix dinghyiengq son' gyauq swfhanswngh dwg gauhcungh haidaeuz, conhgoh cwngzsw, ciusou ciennieb dwg 3 bi siujyoz gyauyuz ciennieb (Cuengh Gun song vah saw fuengyiengq). Youz Namzningz

Swhfan Dayoz caeuq Guengjsae Minzcuz Swhfan Yozyen son' gyauq. Boux hagseng hab diuzgienh lajneix ndaej bauqgauj: Bujdungh gauhcungh bizyez camgya bineix bujdungh gauhgauj, diegyouq hagseng dwg aen yienh(si, gih) dinghyiengq ciuseng; rox gangj Vahcuengh(baugvat rox gangj vahdeih-fueng Vahcuengh); gauhgauj cingzcik daengz faensoq sienq gauj ndaej gauhciz gauhconh Guengjsae.

Ciuq dajveh, doengh gij dinghyiengq song vah saw swfhanswngh neix youq hagdangz hagsib geizgan cienz-

hag, cienzdozninz cungj mbouj aeu, caemhcai ciuq mizgven cwngecwz fat cienzgwndaenj bangbouj dem. Hagseng haeujhag doekgonq aeu ciemdingh 《Mbawhezyi Dajveh Son' gyauq Dinghyiengq Siujyoz Cuengh Gun Song Vah Saw Lauxsae Guengjsae》, bizyez le dinghyiengq faenboiq daengz bonj yienh(si, gih) Cuengh Gun song vah saw siujyoz roxnaeuz diemj sonhag son siujyoz Cuengh Gun song vah saw 8 bi doxhwnj. Ciengzsaeq hwnj muengx(<http://jyt.gxzf.gov.cn/Item/21472.aspx>) bae yawj. (Cau Dwzfeih)

Lungzswng Majdiz Banh "Ciet Dahsau Duenngux" Gingq Vunz Ndaw Ranz



Ndwen 6 ngoenz 6, Lungzswng Gak Cuz Swciyen Majdiz Yangh Dughswng Cinh banh "ciet dahsau duenngux", ngoenz haenx hop-heux "hauq vunz ndaw ranz" vwnzva diuz cawjsienq neix, haiguh dahsau dauq ranzmeh minzcuz fungcingz cunzyou, aen yizsi hauq vunz ndaw ranz, Myauz-vangz aemq dahbawx daengj minzsuz hozdung, fatyiengz gij vwnzva conzdungj ndei hauq bouxgeq gyaez vunz ndaw ranz, yinx ndaej vunzlai dangdieg caeuq vunz mbanj henzyawj daeuj yawjgonz. Ndaw doz dwg vunzlai Myauz-cuz angqcoux bouxhek daeujgyaq ciet.

(Vuz Cencen Se Yungjai)

Vujcon Cin: Fwen Haeuj Hagdangz Cienz Vwnzva Hwnjguh Song Vah Cingzcik Ndei

Ndwen 5 ngoenz 28, daengxcungq lauxsae hagseng aen hagdangz sawq-niemh Cuengh Gun song saw vah Dunghlanz Yen Vujcon Cin Gyanghbingz Siujyoz caez ciengqgok Fwen-cuengh Dunghlanz, neix dwg aen hoih yienjciengq fwen Cuengh Gun song vah haeuj hagdangz gaiq daeuz Vujcon Cin, hozdung youz Cunghgung Dunghlanz Yenveij Senhconzbu daengj bouhmonz lienhab banh, Gyanghbingz Siujyoz caeuq Aen Hezvei Fwen Vujcon ciepbanh. 283 boux lauxsae hagseng Gyanghbingz Siujyoz caeuq gyoengq canghfwen iq Dunghlanz Cin yungh gij

cingz caensaed, gij fwen gyaundeih gangjok ndiepgyaez guekcoj, ndiepgyaez mbanjranz, ndiepgyaez ndwen-ngoenz, yungh fwen ndeidingq caez-caemh angqcoux ciet lwngyez "roek it" daeujdaengz.

Vujcon dwg "aenmbanj fwen Guengjsae", geij bi neix daeuj, ndaej daengz gaep baihgwnz gak bouhmonz haeujcoengh caeuq bangcoh, Vujcon Cin gaenxmaenx doicaenh fwen haeuj hagdangz daengj hozdung, vateimh bouxcoz nyezrauh gyaez minzcuz vwnzva, caemhcai guh son' gyauq, haiguh "dangzgoq Cuengh Gun song

saw vah" caeuq "dangzgoq eu fwen", hawj gyoengq lwngyez rungh bya ndaej riengz hwnj sonhag, gaijgez gij hojnanz gyoengq hagseng hwnjdangz dingq mbouj rox. Gaenxmaenx ciu lauxsae song saw vah miz gingniemh lai, mboujduenh daezswng gij suijbingz sonhag, doicaenh hwnjguh hagdangz vwnzva gaenxmaenx doxhwnj. Hawj gyoengq lwngyez gaenxmaenx fatyiengz gij vwnzva Mbanjcuengh maenhndei, daiqdoengh swnjcienz daegsaek vwnzva.

(Dangz Dan)

SIUSIK DINJ

● Geij bi neix daeuj, Lozcwngz Mulaujcuw Swciyen gaenxmaenx gya-gvangq diuzroen canjnieb banggunz, laebguh dieggoek guhyiengh ciengx nonsei, yungh gij vunqsik guenjguh "gunghsw+dieggoek+hozcozse+nungzhoh", sonyinx gyoengq vunz gohyoz ndaem gonengznuengx ciengx nonsei. Daengz ndwen 5 mued, aen yienh neix gyalai najdieg ndaem gonengznuengx 0.54 fanh moux, gaijcauh suen gonengznuengx maj mbaw noix 1 fanh moux, daengx yienh gonengznuengx najdieg 7.5 fanh moux.

(Mungz Cwnghsw)

● Ndwen 6 ngoenz 7 banhaet, Laizbinh Si Bozvuzgvanz cujcz haiguh baenzroix cawjdaez hozdung — "Fwngzriengj cienz hom" bohranz lwngyez guh daehhom, "man veh cien bi" baij veh doz Mancuengh caeuq "fwngzriengj hag dajsiuq" fwngz siuq mbawdemh cenj daengj, yinx ndaej 200 lai vunz daeuj caeuqfaenh.

(Cangz Yiyen)

● Mboengqneix, Gvangjsih Higiyen Aen Doih Heiquengh cujcz bouxyienj bae daengz Denhdwngj Yen Cingez Cin Denhnanz Siujyoz, son-gyauq hagseng aen hagdangz neix hag biujyienj Heiquengh 《Fwen Laengzroen》, hawj lwngyez Mbanjcuengh roxnyinh gij yinxdaeuz yisuz daegbied gagmiz Heiquengh daihneix, swnjcienz gij vwnzva conzdungj Bouxcuengh.

(Cinz Vwnzswng)

● Ndwen 6 ngoenz 9, Fuzsuih Yen Lungzdouz Yangh banh "ciet youz saenz" ngoenzcienz conzdungj miz daegsaek. "Ciet youz saenz" dwg gij fungsug daegbied gagmiz Lungzdouz Yangh, vunzlai doenggyaq foux lungz foux saeceij, roq gyong roq laz, riuj daengva daengj minzsuz biujyienj, gouzmbaenj vunzding hoenghvuengh, haeuxgwn fungsou, daengx bi youq ndei.

(Cwngz Swjdenz)